

ست الشطار



رسوم : شريف دانش

تأليف : د. منيرة سليمان

ست الشطار

بقلم : د. منيرة سليمان

رسوم : شريف دانس

الكتاب: ست الشطار
تأليف: د. منيرة سليمان
رسوم: شريف دانش
الطبعة: الأولى - ٢٠٠٢
الناشر: ملتقى المرأة والذاكرة - القاهرة
٤ شارع عمر بن عبد العزيز - المهندسين تليفون: ٢٢٥٧١٣٠
رقم الإيداع بدار الكتب: ١٨٢٠٦/٢٠٠٢
الترقيم الدولي: X-09-5095-977
طباعة: ماكس جروب
حقوق الطبع والنشر محفوظة
شكر خاص لهيئة المعونة الكندية (CIDA)



كان ياما كان زمان كان فيه راجل طيب ومراته
كمان ست طيبة، عايشين مع بعض على الخير
والشر يحبوا بعض ويحبوا الناس كلهم، ورينا كمان
كان راضي عنهم ورزقهم بنت قاموا سموها ست
الشطار.



أمها قالت:
أنا نفسى
بنتى تبقى
أشطر واحدة
فى الدنيا ...
شطورة كده
تقرا وتكتب،
تساعد نفسها
وتساعد
الناس، تخط
وتطبخ ليا
وللى حواليا.
تسمع كلام

أبوها وأمها والناس كمان يسمعوا لها.

وأبوها راخر قال: أشطر واحدة فى الدنيا حتبقى بنتي، تجري تنط وتلعب وتركب خيل كمان، طيبة وواعية زى أمها تمام، تساعدني وأعتمد عليها ولما تكبر وتسافر لبلاد قريبة وبلاد بعيدة ترجع تقولي وتحكيلى على اللي شافته واللى عرفته.

وسنة ورا سنة وست الشطار بتكبر وتحقق أمنية أبوها وأمل أمها. والراجل الطيب ومراته قالوا نجيب ولدين شاطرين كمان، ورينا رزقهم بالأمين والعنيد.

الأمين كان أكبر شوية صغيرين من العنيد، والأمين كان روحه فى أخته ست الشطار إكمن أمه وأبوه من يوم ما جابوه وصوه عليها ووصوها عليه: اسمع يا أمين، شاييف ست الشطار إحنا كمان جنبناك علشان تبقى شاطر زيها ولما تحبها حتبقى شاطر زيها. والأمين يمشى ورا ست الشطار طول الليل والنهار، يخلي باله عليها وتخلي بالها عليه. وإكمن ست الشطار كانت شطورة، الأمين كان يبصلها ويتعلم منها الشطارة. بس يا خسارة أخوه بقى العنيد اللي أصغر منه بشويتين كان عنيد،

واكمنه كان عنيد يبص يشوف أخوه الأمين ماشي
ورا ست الشطار، يقوم واخذ بعضه وماشي قدامها
لا يخلي باله عليها ولا حتى شايف شطارتها.

وبعد سنين وسنين ما عدت وكبروا الثلاثة
وشدوا حيلهم، كان في البلد اللي هم عايشين
فيها ملك له أخ تاني ملك برضه في بلد تانية بعيدة
بعث له وقاله:

- إلحقني بلادي غلبانة فقيرة والناس حتموت
من قلة الأكل والميه.

الملك بتاعنا كان عنده فلوس كتيرة وبلاده غنية
ومرتاحة قام قال:

- خلاص أنا حبعت لأخويا الأكل والميه والفلوس
اللى هو عاوزهم.

وقعد يفكر بينه وبين نفسه "طيب بس يا ربي
حبعت الحاجات دي كلها مع مين وأنا لا ليا لا بنت
ولا ولد، لا شاطرين ولا غير شاطرين. قام جه الوزير
بتاعه وقاله:

- يا مولاي أنا سمعت والله أعلم إن فيه راجل طيب ومراته كمان ست طيبة وعندهم من البنات والولاد ثلاثة. بنت شاطرة وإخوتها الإثنين، إيه رأيك تبعتلهم نديهم الأكل والميه والفلوس والمركب كمان يحملوا عليها الحاجة ويتكلوا على بركة الله، ولو همه فعلاً شاطرين حيوصلوا الحاجة كلها من غير خسارة.

الملك وافق على طول وبعث الحراس يجيبوا ست الشطار وإخوتها الإثنين. أمهم لمت هدومهم الثقيلة وقالتهم ده بحر والمطرة يمكن تكون كثيرة، وأبوهم واقف على باب البيت يشاور لهم "مع السلامة، وروني بقى شطارتكم".

وراحوا الثلاثة لحد الملك، العنيد ماشي قدام وقال وشه ورا منه ست الشطار عين على أخوها قدامها وبطرف عينها تلمح الأمين ماشي وراها يخلي باله منها. وصلوا لحد الملك قام قال: الثلاثة دول ماشيين ورا بعض ليه؟. الوزير قاله: ملناش دعوة يا مولاي، إحنا حنديهم الأكل والميه والفلوس

ونسلمهم المركب، يمشوا بقى ورا بعض، يمشوا جنب بعض ... المهم يودوا الحاجة قبل الناس ما تموت من الجوع. الملك قاله: طيب، يلا إتكلوا على الله وإملوا المركب، وتعالى إنت يا ست الشطار - مش ده برضه اسمك - تعالى لما أقولك. قالتله: أيوه يا مولاي.

أخوها الأمين باصص عليها من بعيد مفتح عينيه ومخلي باله، والعنيد راخر باصص عليها من بعيد يقول فى نفسه: إشمعنى بقى ست الشطار اللي الملك نداها من وسطنا؟

الملك خد ست الشطار على جنب وقالها: إسمعى يا ست الشطار ... إنتى طبعاً عارفة إنك واخدة الأكل والميه والفلوس لحد أخويا ملك البلاد الغلبنة، بس برضه أنا فكرت ولقيت إن الأكل والميه والفلوس مصيرهم فى يوم من الأيام برضه حيخلصوا، طيب حتعمل إيه ساعتها الناس الغلبنة؟ إسمعى يا ست الشطار، خدي الخاتم ده، خاتم الملك بتاع أمي سابتهولي وقالتلي "يا إبني لما



تيجي عوزه،
الخاتم ده حيعرف
شُغله. " شيليه يا
ست الشطار جوه
عنيكي لحد ما
توصليه لأخويا ملك
البلاد الغلبنة،
ومتقوليش لحد
عليه ولا حتى
لإخواتك الإتنين.

قالتله ست الشطار: متخفش يا مولاي سرك
فى بير والخاتم ححطه فى مكان أمين. وبلا يا أمين
إنت وعنيد قدامنا سفر لمكان بعيد.
الجو يوميا كان حلو، سما زرقه وشمس منورة
فيها وحمام ونورس أبيض على المركب وحواليها
وست الشطار قالت: خير، ده ربنا والله كريم،
والرحلة إن شاء الله تتم على خير. المركب مشيت
فى البحر تميل شمال وتميل يمين، والسماك عايم
قدامها يوربها السكة وبدلها على الطريق، وست

الشطار على المركب قاعدة تفكر وتفكر كثير: أشيل
يا ربي خاتم الملك فين؟ لو علقته فى رقبتى
تشوفه الناس ويضيع منى، وإن حطيته فى شوال
أو زلعة وجيت أدور عليه يبقى إبرة فى كومة قش.
وهى قاعدة تفكر كده، حيرانة فى حيص بيص،
الدنيا بدأت تشتى. هوا جامد وشمس مفيش.
بصت على يمينها لقت الأمين بردان وعلى شمالها
ولا على باله العنيد. وفى نفسها ست الشطار
قالت: بس لقيتها، عرفت حخبى الخاتم فين، طبعاً
جوه الهدوم وكده ولا حتضيع ولا حتتوه، الدنيا إكمنها
برد، الناس متكلفته ومحدث باصص لحد، أما أشيله
جوه هدومي.

وافتكرت إن الخاتم ميعرفش عنه حد ولو تاهت
أو جرالها حاجة حيروح معاها الخاتم. قعدت ست
الشطار تفكر تانى: طب أشيله مع الأمين ولا
العنيد؟ لو شلته مع الأمين وعرف سره العنيد يبقى
عليه العوض ولو شلته مع العنيد وشافه الأمين
برضه حيفضل فى أمان. ونادت ست الشطار على
أخوها العنيد، هى عارفة طبعه وفاهمة عنده:

اسمع يا عنيد، أخوك أمين بردان وأنت شاكلك مش
بردان، إيه رأيك تديله عبايتك بتكلفت فيها ويتدفى؟
والعنيد طبعاً رد وقال: مين قال إن أنا مش بردان،
دى عبايتى وحتكلفت فيها لحد آخر المشوار.

فرحك قريب". قاموا من نومهم يقولوا معقوله
أذان وسط الموج والبحر؟
ست الشطار فهمت على طول، قالت:
هناك قدام ناس غلبانة مستنيانا.

وفي لمح
البصر بان
أرض وبلد،
رست
المركب
والناس
حوالها
فرحانين
ومبسوطين
يزغردوا مرة
ويعيطوا مرة،



وست الشطار
إطمنت وقالت:
"الخاتم كده فى
أمان"، ومن غير
ما حد ياخذ باله
شبكت الخاتم
جوه هدوم
العنيد ولا من
شاف ولا من
درى.

ومعاهم واقف كمان الملك والوزير بتاعه، ومعاهم
حراس كتير. وست الشطار قالت لإخوتها
الإثنين: يلا بينا نسلم على الملك ونديله الأكل
والمية والفلوس الكثير.

وعلى ده الحال فاتت أيام وأسابيع والمركب
ماشيه، موج بشيلها وهوا يتمرحح بيها. لحد ما
فى يوم من الأيام صحيت ست الشطار وإخوتها
الإثنين على صوت شيخ بيأذن ويقول "يا رب

نزلوا الثلاثة من المركب، العنيد طبعاً ماشي
قدام وورا منه ست الشطار وبخفة إيديها من
جوه هدومه سللت الخاتم ووراها الأمين عينه
عليها شايفها بتعمل إيه، يضحك ويقول: ما هي
ست الشطار أشطر واحدة في البلاد.
وصلوا لحد الملك خدهم بالأحضان وقال:
أهلاً بالشطار، أنا مش عارف أشكركم إزاي.
ست الشطار قالتله: لاشكر على واجب يا



مولاي.
الملك
بص
للوزير
وقاله:
بسرعة
تأكل
الناس
الغلبانة
وتشربهم

كمان وخلي الحراس ينقلوا الفلوس وبقية الأكل
لحد القصر واتفضلي يا ست الشطار إنت
واخواتك الإنتين لحد القصر عندي تقابلي ابني
وبناتي الإنتين.

ست الشطار وافقت وقالت: أهى تبقى
فرصة أدي الملك الخاتم الأمانة. ركبوا الخيل
وفضلوا ماشيين لحد ما لاقوا قصر واقف على
بابه واد جدع واخواته الإنتين. الملك بسرعة
قال: تعالوا يا ولاد سلموا على الشطار.

جم البننتين وورا منهم الجدع، الملك قال:
أدى بقى ست الحسن بنتي، أمها قالت
نسميها كده علشان ما كانش فيه حد فى
أخلاقه أحسن منها، والتانية دي برضه بنتي
ست الجمال، أمها برضه هي اللي سمتها لما
لقت مفيش حد أجمل منها. والواد الجدع ده
الناس بقى هي اللي سمته لما شافت
جدعنته ووقفته وسط الناس الغلابة.

ردت ست الشطار على الملك وقالتله: إحنا
زدنا شرف. الجدع رد وقال: مش قد الشرف

اللي إحنا زدناه، إتفضلوا جوه القصر تترتاحوا
وتاكلوا وتحكولنا عن رحلتكم وبلادكم اللي انتم
جايين منها.

دخل الملك وورا منه الستة وقعدوا كلهم
على ترابيزه كبيرة، الملك على راسها وعلى
يمينه ست الشطار والجدع قدامها وقاعد جنبها
الأمين وقدامه ست الحسن وبعد منه العنيد
عينه على ست الجمال اللي قدام منه.

الملك بعد ما سمى بدأ الكلام وقال: يا
إخوانا إحنا زمان كان عندنا المال والجاه وكنا من
أغنى البلاد.

- أمان إيه اللي حصل يا مولاي؟

- أعمل إيه يا بنتي قلة عقل ووسوسة
شيطان، أنا أصل حكايتي تبتدي من زمان من
يوم ما أبويا جوزني من بنت عمي وجابتلي سبع
ولاد، مش أشكر بقى ربي وأكفي خيرى شري؟
لأ، رحت أدور على البنات وشرطت على مراتي
يا تجييلي البنت يا مش عايز السبع ولاد. مراتي
كانت حامل ساعتها ومن خوفها لما جابت ولد



كمان لمت عيالها وسابت البلاد. خرجت أدور
عليها وعلى الولاد، صرفت اللي قدامي واللي
وراي ولا لقيتها ولا لقيت الولاد وكأنهم فص ملح
وداب. وقعدت سنين وسنين على ده الحال
ماشي من بلد للتانية أدور على الأهل وأدور
على الولاد، وفي آخر المشوار لما غلب غلبي
خدت بعضي ورجعت لبلدي. بس يا خسارة
ساعتها الحال بقى غير الحال، راح المال والجاه
وفضل الغلب والجوع والفقر. ومن يومها وأنا قاعد
أتحسر على اللي كان واللي راح. ولما شافني


وزيرى على ده الحال شار على أتجوز تانى
يمكن أجيب ذرية صالحة وربنا يرضي على. وأدى
أهمه الولاد يا ست الشطار بنتين على واد
جدع.

ست الشطار من طيبة قلبها - ما هي زي
أمها- تسمع حكاية الملك وتعيط على السبع ولاد
اللي تاهوا فى البلاد، وحال الملك الغلبان اللي
ضاع منه المال والجاه، وتقول فى سرها: دلوقتي
بقى أنسب الأوقات، أقول للملك على خاتم الملك
بتاع أمه اللي وقت عوزه بيعرف شغله. وست
الشطار ما هي واعية برضه زي أمها وعينها كمان
على الغلابة.

رجعت تقول فى سرها: الملك ده مش حكيم
وأكيد أمه كانت عارفة عنه إنه مش حكيم علشان
كده سابت خاتم الملك لأخوه، إكمنها خافت منه
ومن قلة عقله.

وردت ست الشطار على نفسها: لو خد الخاتم
ده ملك البلاد الغلبانة عليه العوض ومنه العوض
حيضيع ويتوه منه زي ولاده تمام وتفضل البلاد برضه

في الآخر غلبانة والناس جعانة. بس يا ربي دي
أمانة ولازم توصل لصاحبها ولا تبقى خيانة.
وهي كده في أفكارها سرحانة سألها الجدع:
مالك يا ست الشطار؟ تعبانة ولا حزنانة؟
سكتت ست الشطار وبعد شويه قالتله:
أصله كان سفر بعيد وأنا عايزة أنام.



وفى المنام
والناس كلها نيام
شافت ست الشطار،
اللهم اجعله خير،
نفسها وأمها وأبوها

كمان راكبين حنطور بتجره خيول، وعلى باب القصر
وقف الحنطور ومد إيده شخص يساعد ست الشطار
فى النزول. مدت إيدها ست الشطار وقبل ما تقوم
من النوم لقت منور فى صباعها خاتم الملك.
ولما جه الصبح نوت ست الشطار والنية لله تدي
خاتم الملك بنفسها للجدع، أحسن واحد يصونه
الجدع، حيخلي باله منه زي ما خلى باله على

الناس الغلبانة، أصله طيب وشهم وجدع، وكده
تبقى الأمانة برضه وصلت لصاحبها.

وهي ماشية فى طريقها قابلها الجدع:

- صباح الخير يا ست الشطار.

- صباح الخير يا جدع، اسمع لما أقولك لما الواحد

تكون معاه أمانة يعمل بيها إيه؟

- "يردها طبعاً لصاحبها". ده الجدع هو اللي بيقول.

طب امسك بقى الخاتم ده حرز عليه وشيله جوه

عينك. ده أصله

خاتم الملك

بتاع جدتك،

سأبته لعمك

وقالته "يا

ابني لما

تيجي عوزه

الخاتم ده

حـيعرف

شغله".



الملك بتاعنا قال العوزه جت وإدانى الخاتم أوصله
لأبوك. بس أنا من أبوك ملك البلاد الغلبانة خايفة
وقلقانة، إكمنه قد كده مش حكيم، يضيع الخاتم منه
ولا يتوه وتفضل برضه البلاد فى الآخر غلبانة.

أحسن واحد حيصونه هو إنت يا جدع، وأنا كده
خلصت ذمتي قدام ربنا. خلي بالك على الخاتم.

وقعد الجدع يفكر فى اللي جابتله الأمانة
لحد ما دخل عليه أبوه ملك البلاد الغلبانة، وقاله:
مالك يا جدع؟

- بافكر يا والدي فى ست الشطار.

- ونعم التفكير يا ابني.

- إيه رأيك يا والدي فى بنات وولاد شاطرين

وجدعان؟

- على بركة الله يا ابني، بس إلحقها ست

الشطار قبل ما ترجع لبلادها.

جري الجدع على الحصان، وطيران على

مركب ست الشطار ... لقي شرع وقلوع

مرفوعة، وناس بتشاور للماشيين. نده الجدع

بأعلى حسه: استني يا ست الشطار.

خير يا جدع، فيه حاجة نقصاك؟

قال: أه، ناقصني الشطارة ... تتجوزيني يا

ست الشطار؟ أهو نبقى بنكمل بعض ونجيب

كمان بنات جدعان وولاد شاطرين.

ضحكت ست

الشطار وقالتله:

ده منام واتحقق.

ومن بعيد واقف

يبص عليهم ملك

البلاد الفلبانة،

يضحك فى سره

ويقول: الله

يرحمك يا أمى، أهو الخاتم أهه عمل شغله.

وفى يوم الفرح الكبير وصل ملك البلاد

المرتاحة ومعاه الراجل الطيب ومراته الست

الطيبة يحضروا فرح بنتهم ست الشطار على

جوزها الجدع ... وابنهم الأمين على ست

الحسن ... وابنهم العنيد على ست الجمال.

وبعد الفرح والظيطة ما خلصوا، وعدت

سنين وسنين ... فضلوا الستة عايشين فى

القصر الكبير،

وخلفوا صبيان

وبنات كثير: الشاطر

والجدع والطيب

والعنيده والجميل

والأمينه والشرير ..

وفى الآخر اتلخبطوا

كلهم على بعض

ولا عرفنا حد من حد ولا ده من ده.

وتوته توته، فرغت الحدوته ..

وسبحانك يا رب يا مسبب الأسباب.



" في المنام والناس كلها نيام شافت ست الشطار،
اللهم اجعله خير، نفسها وأمها وأبوها كمان راكبين
حنطور بتجره خيول، وعلى باب القصر وقف الحنطور ومد
إيده شخص يساعد ست الشطار في النزول. مدت
إيدها ست الشطار وقبل ما تقوم من النوم لقت منور
في صباعها خاتم الملك..."

هذه سطور من حكاية "ست الشطار" التي كتبتها منيرة سليمان من
وحي الحكايات الشعبية المصرية المليئة بمغامرات الشاطر حسن.
وفي هذه الحكاية تقدم منيرة شخصية ست الشطار ومغامرتها في
توصيل خاتم الملك إلى الشاب الجدع.

وقد تمت كتابة هذه الحكاية في إطار كتابات مجموعة "قالت الراوية"
في ملتقى المرأة والذاكرة، وتضم مجموعة "قالت الراوية" في ملتقى
المرأة والذاكرة عددا من النساء اتخذن من الشكل القصصي وسيلة
لتقديم حكايات تمنح المرأة صوتا وأدوارا إيجابية أقرب إلى واقعنا،
سعيًا للخروج بنا من الصور النمطية المتكررة للمرأة، إلى جانب
التأكيد على قيم المساواة والعدالة والخير للبشر جميعا.

صالة كلاس



ملتقى المرأة والذاكرة